

陶雲汀先生奏疏

奏疏卷三十二目錄

江督稿

安化陶澍

拏獲販賣私鹽興販婦女回俸等匪審擬摺子
附請鼓勵拏獲梟犯出力各員摺片

拏獲沿江詐擾積匪審擬摺子

恭報重運二進漕船渡黃完竣摺子

清水敵黃漕船順利及湖水浩瀚啟壩洩水各

情形摺子

附奏上冬守凍銅船全數催僱出境摺片

籌議糧船夾帶私鹽請扼要稽查摺子

請遞緩被淹場竈積欠折價錢糧摺子

兩淮清查案內庚寅佔用各款請同前墊暫緩
歸補摺子

籌議借項官督商運淮北各滯岸摺片

附陳兩淮運庫歷年欠解各款請緩攤帶摺片

挈獲販賣私鹽興販婦女回倂等匪審擬摺子
奏爲挈獲回倂等匪販賣私鹽興販婦女竝逞兇
拒捕致傷弁兵差役提省審明分別辦理恭摺
奏祈

聖鑒事竊照江南淮揚廬鳳一帶向有回匪倂匪二
種各自糾結黨與執持器械販賣私鹽動輒逞
兇糾毆甚至抗官拒捕大爲地方鹽務之害臣
疊飭文武認真查挈據護理遊兵營遊擊蕪采
營守備趙瑾帶同遊兵營西梁千總白雲從等
挈獲回匪趙鳴鶴等十四名竝大小婦女幼孩

二十名口亮器順刀等件又據六合儀徵等營
縣挈獲冷太等十五名又據揚州瓜洲等營並
江都縣挈獲倭匪王正標等十八名經臣

奏明分別提省委審隨經江寧藩司陸言督同署

江寧府黃在厚上元縣黃冕署江寧縣李金芝
候補鹽運判童濂等究出梟匪李二楊四等潛
匿安徽當塗縣地方固戶常三倭子潛匿江都
縣地方又經臣派委員弁分往查挈卽據當塗
縣知縣趙汝和稟報會同蕪采營外委馬錦魁
等選帶兵役往挈詎梟匪逞兇拒捕施放鳥鎗

中傷營兵縣役竝將外委兵役砍傷該外委等奮力擒拏格鬪將匪犯楊恒山楊盛良格傷當獲楊恒山楊八黃名興丁有楊盛良劉成選邱華菖七犯竝獲烏鎗順刀鐵叉等項兇器該縣當將各犯併兇器親押來省楊恒山楊盛良先後在途在監因傷身死又據護理遊兵營遊擊趙瑾帶同兵役追獲爲首拒捕之李二又據委員會同江都縣拏獲常三倚子先後解省均飭委江寧藩司督同各委員審訊茲據審明議擬招解前來

臣

親提各犯復逐加研訊緣李二楊

八黃名興丁有楊盛良邱華莒劉成選趙鳴鶴
耿如林耿景玉聶潮盛聶潮林朱明安李大倫
蔡廷標王宗剛張鳴鶴常三倭子胡載華胡載
雲係籍隸安徽壽州宿州懷遠定遠鳳臺等州
縣回倭胡載華於道光六年在江寧縣販賣私
鹽千餘觔嗣復零星販私不記次數十年冬間
該犯與族弟胡載雲及在逃之李加海前赴無
爲州佔住龍墩廟馬頭遇有鹽船經過船戶水
手偷賣夾帶私鹽該犯等代爲轉賣每次数百
觔及數十觔不等常三倭子向在江都縣仙女

廟地方小賣營生十一年春間因揚州地方常
有人買賣婦女起意窩囤轉賣獲利李二楊八
黃名興丁有邱華菖劉成選及已被格殺之楊
恒山楊盛良向俱攜帶刀械往來淮揚廬鳳之
間藉賣私鹽爲業每次数千觔及數百觔不等
十一年二月李二等八人與在逃之楊四于老
四徐洪堯楊上斌楊明秀韓保菖楊土地楊美
華楊二麻子楊添幅先後由原籍各帶刀械赴
當塗縣東塘村地方租住胡姓房屋圖販私鹽
趙鳴鶴耿如林耿景玉聶潮盛聶潮林朱明安

李大倫蔡廷標王宗剛張鳴鶴十人亦以零星
販私爲業十一年正月趙鳴鶴等十人先後由
原籍來至揚州因聞該處婦女價賤各自起意
販往蕪湖轉賣爲婢二月趙鳴鶴在常三倂子
家買得在逃之郭二姦拐之鄭臧氏及幼子鄭
向林幼女鄭跣子鄭小二漢四名口耿如林在
常三倂子家買得在逃之戴九姦拐之陳董氏
一口又在常三倂子家代蔡廷標向鹽城縣人
湯二買得伊幼女湯女一口耿景玉在常三倂
子家買得在逃之徐漢林誘拐之徐張氏一口

又在江都縣向朱介菴買得伊女徐朱氏一口
聶潮盛在江都向吳萬貴買得伊幼女吳芝英
一口又向張蔡氏買得伊媳張夏氏一口聶潮
林在泰州買得在逃之汪自鳳誘拐之徐王氏
一口朱明安在江都買得在逃之孫長綠誘拐
之曹小八一口李大倫在常三侉子家買得在
逃之陳七誘拐之陳楊氏一口又在儀徵縣向
魏先買得伊幼女魏雲紅一口又向周斌買得
伊童養媳周九子一口蔡廷標在儀徵向馬成
龐買得伊童養媳許三子一口又向趙舉買得

伊幼女趙二子一口王宗剛在儀徵向余四買
得伊幼女余蘭英一口張鳴鶴在儀徵向白五
買得伊幼女白七子一口又向談夢安買得伊
繼女周小女一口趙鳴鶴耿如林耿景玉聶潮
盛聶潮林朱明安隨在江都地方雇坐段潮貞
船隻言明興販情由裝赴蕪湖交卸段潮貞貪
利允從趙鳴鶴等各帶所買婦女於二月十九
日上船開行趙鳴鶴與鄭臧氏姦宿耿如林與
陳董氏姦宿耿景玉與徐張氏徐朱氏姦宿聶
潮盛與張夏氏姦宿聶潮林與徐王氏姦宿朱

明安因曹小八年幼未與通姦二十二日李大倫蔡廷標王宗剛張鳴鶴在儀徵地方雇坐楊起舟船隻亦言明興販情由裝赴蕪湖交卸李大倫因陳楊氏賦性癡呆未與通姦蔡廷標等所帶各女年俱幼穉無姦二十四日早趙鳴鶴李大倫等船隻先後行至當塗縣慈湖口地方一同拉絳上行適有胡載華胡載雲與李二楊八丁有楊四楊上斌于老四徐洪堯分坐划船兩隻迎探私鹽船信息在彼停泊食飯楊四見趙鳴鶴等船內載有婦女料係興販喚令胡載

華上岸向詢趙鳴鶴等素知楊四爲人強橫慮將婦女搶去當卽一齊上岸趕向楊四等捉拏楊四李二楊八丁有楊上斌于老四徐洪堯棄船奔逃胡載華胡載雲落後被趙鳴鶴等追及捉拏過船將船開行胡載華船戶戚桃年當赴遊兵營所屬之西梁汛喊稟比趙鳴鶴等船至和州地方胡載華出言辱罵趙鳴鶴氣忿起意將胡載華之耳割去使其不能見人當與聶湖盛李大倫商允令聶湖盛等將胡載華拴住趙鳴鶴自取順刀割去胡載華左耳輪將胡載華

胡載雲釋放胡載華隨赴和州喊稟當經護遊
兵營遊擊趙瑾帶同千總白雲從會同和州知
州鍾冀選帶兵役追至東梁山江心該匪等持
刀意欲拒捕該千總白雲從首先跳過匪船奪
刀適泰州江都儀徵寶應當塗等州縣差役聞
風踵至同將趙鳴鶴耿如林耿景玉聶潮盛聶
潮林朱明安李大倫蔡廷標王宗剛張鳴鶴及
各婦女船戶一併挈獲稟報提省究出楊四李
二楊八丁有楊上斌于老四徐洪堯潛匿當塗
地方當經派委督標把總艾萬年馳往會同該

縣知縣趙汝和蕪采營外委馬錦魁選帶兵役
於三月十五日行抵楊四等所住之東塘村地
方楊四楊上斌于老四徐洪堯楊明秀韓保菖
楊土地楊美華楊三麻子楊淦幅先於二月二
十六日回籍囑令李二楊恒山楊八黃名興丁
有楊盛良邱華菖劉成選在彼暫住等候私鹽
船隻維時李二聽聞官弁捉拏起意糾衆拒捕
當將前後門用什物堵塞對衆聲稱與其被拏
不如拚命拒敵即使殺害官弁亦不過問擬死
罪楊恒山楊八黃名興當各允從丁有楊盛良

邱華菖劉成選畏懼勸令李二等開門自行出
首不允李二攜取鳥鎗楊恒山執持火繩從墻
洞向外點放中傷營兵蘇祥左腮腴右肩甲該
縣趙汝和與外委馬錦魁隨將前門撞開李二
與楊恒山突出施放鳥鎗中傷縣役黃廷鑑兩
眼胞腮腴鼻梁唇吻李二將鎗丟棄攜取順刀
楊恒山楊八黃名興各攜順刀鐵鎗一齊擁出
丁有楊盛良邱華菖劉成選亦各攜順刀魚叉
木棍在後跟隨外委馬錦魁與兵役上前圍捉
李二楊恒山用刀亂砍致傷馬錦魁額顱左手

背竝砍落縣役陶鸞右手食指砍傷營兵汪應海右胳膊楊八黃名興在場吶喊助勢該縣趙汝和外委馬錦魁把總艾萬年督率兵役奮力奪刀擒拏彼此格鬪時已昏夜人衆不知兵役何人將楊恒山楊盛良格毆致傷當將楊恒山楊八黃名興丁有楊盛良劉成選邱華菖拏獲竝起獲鳥鎗順刀鐵錨魚叉等件李二脫逃經護遊兵營遊擊趙瑾聞信選派弁兵帶同縣役追獲竝委員在江都會同營縣拏獲常三侉子先後解省屢審各供認前情不諱詰無另犯不

法別情案無遁飾查例載部民軍士犯罪在官如有不服拘拏逞克殺害本管官已傷者爲首照光棍例斬決爲從下手者絞候又兵民聚衆帶有軍器與販私鹽十人以下拒捕傷至二人以上者爲首斬監候下手之人絞監候其不會下手者俱仍照私鹽律杖一百徒三年又越境與販官司引鹽至三千斤以上者問發附近地方充軍又律載犯無引私鹽者杖一百徒三年又例載販賣私鹽數至三百斤以上不將賣鹽人姓名供出卽將該犯於應得本罪上加一等

定擬又同民結夥三人以上執持器械毆人之
案其糾夥共毆之犯但有一人執持器械者不
分首從發雲貴兩廣極邊煙瘴充軍又誘拐婦
人子女和誘知情爲首者發極邊足四千里充
軍被誘之人減等滿徒又夥衆開窩誘取婦人
子女藏匿勒賣事發者不分良人奴婢已賣未
賣審係開窩情實爲首照光棍例擬斬立決又
興販婦人子女轉賣與他人爲奴婢者杖一百
流三千里爲從減一等各等語此案李二等均
係壽州僑匪向賣私鹽爲業此次該犯等八人

各攜順刀烏鎗等項軍器聽從在逃之楊四在
當塗地方等候私鹽迨經營縣查拏李二膽敢
起意拒敵施放烏鎗中傷兵役竝將外委馬錦
魁砍傷實屬目無法紀馬錦魁係本汛外委緝
私係其專責又經檄飭會拏卽屬本管官長應
卽照例問擬李二除聚眾販私十人以下拒捕
傷至二人以上爲首罪止斬候不議外合依部
民軍士犯罪在官不服拘拏違克殺害本管官
已傷者爲首照光棍例斬決例擬斬立決該犯
係積慣梟徒執持鎗刀拒捕情節甚兇當此整

頓緝捕之時該犯膽敢拒捕傷官必須嚴加懲
創未便稍事稽誅臣於審明後卽恭請

王命飭委署江寧府知府黃在厚臣標中軍副將沙
序元將李二綁赴市曹卽行正法仍飭將首級
於私梟出沒各所懸掛示衆以昭炯戒楊恒山
聽從拒捕用順刀砍傷弁兵應照爲從下手例
擬絞監候已被格傷身死應毋庸議楊八黃名
興均屬販私俵匪聽從拒捕雖未下手傷人惟
執持兇器在場吶喊助勢卽屬同惡共濟若僅
照興販私鹽三千觔以上罪止擬軍楊八黃名

興均應從重發往新疆給官兵爲奴丁有楊盛
良邱華菖劉成選向俱攜帶刀械往來販私每
次數十觔及數百觔不等未便因此次未買私
鹽亦未拒捕傷人稍從末減丁有等四犯均應
比照越境興販官私引鹽至三千觔以上例發
附近充軍楊盛良先被格傷於取供後在監身
死應毋庸議趙鳴鶴聶潮盛李大倫均係回匪
向曾零星販私今復興販婦女因胡載華往向
查詢趙鳴鶴輒卽將其捉住復因被罵糾約聶
潮盛李大倫將胡載華用所攜順刀割去左耳

實屬克惡趙鳴鶴等三犯除販賣私鹽與販婦女欲圖轉賣竝與各婦女通姦各輕罪不議外合依回民結夥三人以上執持器械毆人之案其結夥共毆之犯但有一人執持器械例發雲貴兩廣極邊煙瘴充軍均仍從重發往新疆給官兵爲奴耿如林耿景玉聶潮林朱明安蔡廷標王宗剛張鳴鶴亦均係回匪所販婦女俱係欲圖轉賣耿如林等七犯除向曾零星販私竝與各婦女通姦各輕罪不議外均各依興販婦人子女轉賣與他人爲奴婢例杖一百流三千

里常三僂子窩國婦女轉賣獲利數日之內轉賣大小婦女至七口之多且明知各婦女均係被人誘拐輒敢代爲轉賣殊屬不法惟訊無開審勒賣重情自應比例酌減問擬常三僂子應比照夥衆開審誘取婦人子女藏匿勒賣爲首照光棍斬立決例量減一等杖一百流三千里胡載華先會販賣私鹽一千餘觔嗣復與伊弟胡載雲佔住龍墩廟馬頭爲鹽船船戶水手代賣私鹽訊其賣鹽人姓名該犯不肯據實供出自應照例問擬胡載華合依販賣私鹽數至三

百觔以上不將賣鹽人姓名據實供出者卽將該犯於應得本罪上加一等問擬例應於犯無引鹽杖一百徒三年罪上加一等杖一百流二千里胡載雲聽從販私應於胡載華流罪上減一等杖一百徒三年船戶段潮貞等明知趙鳴鶴等典販婦女貪利受雇裝載卽與爲從無異段潮貞楊起舟均應於耿如林等流罪上減一等杖一百徒三年段潮貞左腿殘廢不能行走應照律收贖其餘軍流徒各犯到配均照例折貴安置胡載雲據供母老丁單是否屬實飭令

定遠縣確查照例辦理丁有據供孀婦獨子惟
該犯情節較重應毋庸查辦以上各犯分別照
例刺字鄭臧氏陳董氏徐張氏陳楊氏徐王氏
曹小八係姦拐和誘同逃均應照和誘知情被
誘之人減等滿徒例杖一百徒三年鄭臧氏陳
董氏先與郭二戴九通姦係犯姦之婦杖決徒
贖徐張氏陳楊氏徐王氏前未犯姦此次被耿
景玉等姦宿情非得已應與曹小八所得杖徒
之罪俱准照律收贖徐朱氏張夏氏及幼女吳
芝英魏雲紅周九子許三子趙二子余蘭英白

七子周小女十口訊係各婦女之父及翁姑因
貧賣出應與鄭臧氏等六口及鄭臧氏子女分
別解回各原籍州縣查傳的實親屬給領如無
親屬具領由該州縣當官妥爲擇配以免失所
其蔡廷標在常三侑子家所買之湯女年甫五
歲不能取供現據常三侑子等供係湯女之父
鹽城縣人湯二負至江都鬻賣是否屬實應將
湯女解送鹽城縣飭令該縣查傳湯二到案確
訊倘有略誘別情卽將常三侑子另行從重辦
理船戶戚桃年訊無夥同胡載華等販私情事

應子省釋逸犯楊四等勒拏務獲另結起獲烏
鎗等件發縣彙報趙鳴鶴等各犯經泰州江都
儀徵寶應當塗各州縣差役協同拏獲失察處
分應請免議冷太等十五犯王正標等十八犯
另行分別審辦除另敘供冊咨部外所有獲犯
審辦緣由理合會同江蘇巡撫臣程祖洛安徽
巡撫臣鄧廷楨恭摺具

奏伏乞

皇上聖鑒勅部覈覆施行謹

奏

道光十一年四月初三日具

奏二十七日奉到

硃批所辦甚好刑部議奏欽此

部議
覆准

附請鼓勵拏獲梟犯出力各員摺片

再者回傍各匪逞兇販私佔立馬頭竝販掠婦女訛詐行船種種積惡爲害地方此次各營縣經臣劄飭拏獲人犯計數十名之多現在分案懲辦查當塗縣知縣趙汝和外委馬錦魁於會拏各匪時被李二放鎗拒捕致傷兵役該縣與外委等將前門撞開楊恒山復施放鳥鎗與楊八等持刀擁出該外委首受砍傷仍毫無退縮帶同兵役將楊八等七犯立時擒獲實屬奮不顧身而護理遊兵營遊擊蕪采營守備趙瑾督

同遊兵營千總白雲從先聞有逞兇傷人之梟
匪卽追至東梁山江心各匪持刀意欲拒捕該
千總白雲從首先跳過匪船奪刀將趙鳴鶴等
十餘人全行拏獲趙瑾復將拒捕逃逸之首犯
李二擒獲俾正典刑緝捕不遺餘力現當整頓
離網之際能將大夥拒捕梟犯一齊獲辦實足
以示懲創而儆頑合無仰懇

疏

必應加恩鼓勵

天恩俯准將蕪采營守備趙瑾遊兵營千總白雲從
蕪采營外委馬錦魁各以應升之缺儘先升補
俾示鼓勵其受傷各兵役已由臣優給獎賞並

分別存記候拔當塗縣知縣趙汝和失察大夥私梟潛匿在境例有處分惟該令一經接劄卽會營親往兜拏將拒捕要犯全獲功過尙足相抵應請免其議處至此案人犯頗衆各委員連日研審究出要犯多名隨拏隨辦除現任府縣未敢請獎外查有署江寧縣候補大挑知縣李金芝候補鹽運判童濂承審尤爲出力該二員久在省城發審案件極爲得力茲於李二等案竭數晝夜之力悉心研鞫俾積惡梟匪得以隨案究出按名拏辦實屬認真能事查候補大挑

知縣李金芝業已輪補到班應請不論繁簡卽行補用候補鹽運判童濂遇有本班缺出儘先補用如蒙

允准不特各該員感激奮興臣亦得收指臂之助臣爲鼓勵人材起見謹附片具

奏伏乞

聖鑒訓示謹

奏

道光十一年四月初三日附片具

奏四月二十七日奉到

硃批另有旨欽此同日奉到道光十一年四月十六

日內閣奉

上諭陶澍奏請將拏獲大夥拒捕梟犯之各營縣及
審案出力之委員分別施恩等語現當整頓巖務
之際該營縣各員能將拒捕梟犯立時擒獲數十
名之多緝捕認真必應加恩鼓勵著照所請所有
蕪采營守備趙瑾遊兵營千總白雲從蕪采營外
委馬錦魁准其各以應陞之缺儘先陞補當塗縣
知縣趙汝和失察大夥私梟潛匿在境例有處分
惟該知縣一經接劄卽會營親往兜拏將拒捕要

犯全獲功過尙足相抵著免其議處至承審此案之委員審辦出力亦應量予獎勵大挑候補知縣李金芝業已輪補到班著不論繁簡卽行補用候補鹽運判童濂著遇有本班缺出儘先補用該部知道欽此

拏獲沿江詐擾積匪審擬摺子

奏爲拏獲沿江詐擾積匪審明定擬仰祈

聖鑒事竊臣訪聞淮揚一帶每有匪徒假冒巡鹽兵
役在江劫搶訛詐擾害客船飭據六合儀徵等
營縣嚴密搜捕拏獲積匪冷太等十五名經臣
行提來省劄委江寧藩司督同府縣確密辦理
附片奏

聞在案茲據江寧布政使陸言督同委員審擬詳解
前來臣親提研鞫緣劉志榮冷大陸彥標冷二
劉潮綠劉耀章必高胡老漢劉潮幅陳三千李

大舟劉大毛子郭有貴冷春華陳大力均籍隸
儀徵縣陸彥標曾充儀徵縣河快因誤公斥革
該犯等均在沿江一帶小貿營生或盜划船度
日冷太劉大毛子郭有貴先於道光五年二月
起至八月聽從先獲擬結之張大興糾約假冒
巡鹽兵役出江訛詐客船三四次分得錢文因
張大興被獲該犯等各處逃避至八年冬間復
回儀徵與劉志榮會遇各道貧難劉志榮起意
假充巡役在江查鹽訛詐客船向冷太等商允
劉志榮做就燈籠一箇上貼公務正堂四字竝

在不識姓名鐵店打造查鹽鐵簽二根又先後
糾約冷二劉潮綠劉耀胡老漢韋必高竝未獲
之吳大武吳盛章夏扣子薛三花子吳洪嘉吳
洪幅等十餘人分坐劉潮幅李大舟陳三千劉
大毛子冷春華陳大力划船言明訛得錢文按
股分派自是年冬間起至十年秋止或一月出
江訛詐數次或數月出江訛詐一次每次同夥
或十數人或數人所詐錢文或數百數千文不
等十年九月內有己革河快陸彥標聞知向劉
志榮恐嚇劉志榮畏懼每次提分錢一二百文

給陸彥標收用十年冬間陸彥標冷太郭有貴
劉大毛子亦各先後起意糾約原夥訛詐客船
數次每次所詐錢文爲首之人分得雙股餘俱
各分一股其犯事地方月日同夥人數詐錢數
目均各記憶不清各犯分得錢文亦俱花用臣
以該犯等彼此糾夥出江訛詐已久據稱是詐
非搶殊難憑信更恐此外另有不法重情復向
嚴詰據供伊等假冒巡役實止藉圖訛詐如果
欲行搶奪何必冒役查私此外亦委無不法別
案等情矢口不移案無遁飾查例載兇惡棍徒

屢次生事擾害良民者民人發極邊足四千里
安置等語此案劉志榮等假冒巡鹽兵役製造
燈籠鐵簽屢次出江藉查私鹽爲名訛詐客船
嚇取錢文實屬爲害行旅若照恐嚇取財計贓
科斷未免輕縱自應從重問擬劉志榮起意糾
人屢次訛詐冷太郭有貴劉大毛子先聽從張
大興劉志榮疊次訛詐客船後復自行起意糾
人訛詐陸彥標先向劉志榮嚇分贓錢後又自
行起意糾人訛詐數次均屬爲首劉志榮冷太
郭有貴劉大毛子陸彥標俱應照克惡棍徒屢

次生事擾害例發極邊足四千里充軍劉潮綠
劉耀韋必高胡老漢冷二屢次聽從訛詐分贓
劉潮幅陳三千李大舟冷春華陳大力聽從入
夥盪船分得贓錢非止一次均屬爲從劉潮幅
與劉潮綠係屬弟兄冷太與冷春華係屬父子
但係侵損於人應仍依凡人定擬劉潮幅劉潮
綠冷二冷春華劉耀韋必高胡老漢陳三千李
大舟陳大力均應於劉志榮等軍罪上減一等
各杖一百徒三年各犯事犯雖在本年正月十
二日恭奉

恩詔以前係到官在後且在不准援減之列應各定
地發配分別刺字折責充役郭有貴陸彥標俱
供親老丁單係克徒擾害地方應照例不准畱
養其爲從擬徒之冷二據供親老丁單是否屬
實應飭縣查明另辦各犯所得贓錢訊無確數
燈籠鐵簽俱已毀棄無從查追逸犯吳洪喜等
獲日另結此案匪犯係地方文武自行挈獲失
察職名應請免議除備具供冊咨部外所有訊
擬緣由理合會同江蘇巡撫臣程祖洛恭摺具
奏伏乞

皇上聖鑒勅部議覆施行謹

奏

道光十一年四月初三日具

奏二十七日奉到

硃批刑部議奏欽此

部議
覆准

恭報重運二進漕船渡黃完竣摺子

總河會同

奏爲重運二進漕船渡黃完竣日期恭摺具

奏仰祈

聖鑒事竊照本年首進漕船渡黃完竣及首幫挽出

江境日期前由

臣張井

奏報在案查二進船隻先經

臣

陶澍專委提催又

於前來清江時沿途親爲催儻押令星夜行走

惟因洪澤湖水勢浩大清江浦以上至運口各

閘壩溜勢湍激高下懸殊提溜上行其勢不能

迅速截至三月三十日清晨儻入臨清堰內漕

船尚不足一塘之數啟放正需守候臣張井在
壩次察看河湖情形竝順黃壩誌椿存水核計
清水已高黃水七尺因思高下無幾其力縱不
足以刷黃而現在洪湖異常盛漲藉行漕以資
分洩亦屬兩有裨益當將臨黃壩堰啟除清水
卽時外注清黃交滙處所立見跌刷深通存塘
船隻唧尾放渡後船隨到隨行至本月初三日
將二進尾幫浙江杭嚴三幫船渡黃北上查二
進共三十六幫計船一千五百一十隻全數完
竣連前共過船二千五百七十五隻計五十九

幫仍催令三進在前之寧波後等幫跟接行走
較去歲有閏之年二進船隻於四月二十三日
渡竣本年計早二十一日伏查江境本年清黃
並漲月前適至相平辦理倒塘實虞遲滯今因
湖水太旺反得暢出敵黃僅此後托蒙

聖明福庇黃水再能暢落或不再形加長則三進全
漕竟可望清水浮送但節氣已交夏令黃水長
發靡常臣等惟當隨時斟酌情形相機辦理以
期運行妥速早登

天庾仰慰

宸廔其邳宿運河循照向例飭令套塘提放現在閘
河水勢充裕據報首進船二十五幫於三月二
十六日挽出江境船八百零九隻計二十幫所
有二進漕船渡黃完竣日期謹會同漕運總督

臣 吳邦慶循例由驛具

奏伏乞

皇上聖鑒謹

奏

道光十一年四月初三日會

奏四月十四日奉到

硃批覽奏欣慰辦理甚屬得宜欽此

清水敵黃漕船順利及湖水浩瀚啟壩洩水各

情形摺子

總河
會稿

奏爲清水敵黃重運漕船行走順利惟洪湖水勢
浩瀚暫消復漲加意籌防及下游揚糧廳啟壩
洩水各情形仰祈

聖鑒事竊查本年重運二進渡黃完竣日期及啟壩
通漕經臣等恭摺

奏報併將洪湖水漲掣塌石工啟壩分洩籌催重
運各緣由附片奏

聞查禦黃壩自前月三十日清高於黃啟通之後旬

餘以來黃水旋長旋消重運漕船均係順流渡送無須倒塘灌放臨清攔黃兩堰免於啟閉行走尚爲順利其挽上三閘因上水高於下水三尺餘寸逆流繹挽極爲費手經臣等及漕臣分委員弁任工晝夜併力起辦臣等復時往親催現在三進幫船截至十二日止已渡黃六百二十餘隻下餘幫船一千一百數十隻可以計日償渡惟洪澤湖水勢日前長至一丈九尺五寸溯查案據自有此湖以來未有存水如此之大者自上月下旬次第啟放仁河信壩之後十日

之久始消水五寸而初九日大雨傾注又復接長三寸現在仍存水一丈九尺三寸刻當夏令雨水不時以束清壩及仁河信壩三處分洩尙復停積不消倘此後再有增長勢必不能容納

臣等晝夜焦思籌維至再

臣

陶澍專駐河口併

往來各閘壩催僱船行

臣

張井卽馳赴堰盱兩

廳督同道廳等按工履勘所有前次風掣各段落及上冬掣塌段落均先經該道鄒錫淳任工搜護一律完整一面飭估掣塌層路分別補砌現值異漲尙未能尅日興工其石後堤頂已幫

寬至十五丈者現在被風汕刷至窄之處尙存
寬八丈至五壩檔內尙未加幫堤頂止寬十丈
之處現已僅存五丈少遇微風浪已潑過堤東
駭目驚心實爲萬分危險當飭廳營小心防守
併於緊要處所多備碎石料塼以備搶護之需
湖水如此旺盛本宜接啟別道河壩以冀暢消
惟下注之水由高郵邵伯湖遞達至揚糧廳入
運歸江現在江廣重船正在揚糧廳境行走該
廳三溝閘水勢已積存至一丈七尺一寸較上
年盛漲尙大四寸再有增益實難容納前此仁

河信壩啟放後因恐該廳運河東堤吃重卽

奏明飭委叅將張兆前往會同道廳及漕

臣委員

劉燦將東岸橋壩先放數處宣洩歸江疊次接
據該道將等稟稱已次第將瓦窑舖東灣西灣
金灣鳳凰等橋壩啟放洩水尙暢惟溜勢橫趨
下游糧船到此行走倍難經該道將督同廳營
於西岸各水口如杜家溝李家溝聖塘溝刁家
溝張卜溝淮子河緯路尾青龍溝觀音巷等處
或建搭木橋或軟廂草壩幫築柴土戢工補還
缺口廂修緯路以資安設絞關多加人夫併力

緯挽每日過船數十隻然已有杭嚴二幫船一
隻海寧所幫船三隻湖北三幫船一隻吸入鳳
凰橋口門之事幸壩底先經拉撈淨盡並無損
傷現已由鹽河緯挽入運該廳尙有未啟之壁
虎橋灣頭閘人字河三處分洩最靈無如高下
過多一經啟放則分漚吸船更爲可慮不得不
稍爲停待查在後幫船不過五六百隻日內總
可全過邵伯鎮臣張井於十一日馳回清江一
俟該廳報到臣等卽將上游洪湖之智壩義禮
二河下游運河之灣頭壁虎人字等河刻日啟

放騰空湖面以備續漲惟是向來督防湖河總
在伏秋大汛大雨時行之際今距大汛尙有兩
月而黃水旣未大消洪湖疊次異漲又值重運
盛行之際若暢求宣洩必致吸溜誤漕若不及
早宣洩現在業已拍岸盈堤處處危險設再如
初九日之大雨或值蛟水驟發或間起西風則
其事殆難設想是南河本年緊要情形尙不在
黃河而在洪湖與下游之運河東岸臣等惟有
同心努力督飭大小員弁星羅碁布慎守嚴催
而艱鉅萬分實深惴慄惟冀仰邀

聖主洪福風日晴和不至增漲俾兩旬之後重運完竣堤堰掣塌各工得以次第辦理實爲至幸至北運河水勢自山東交界以至楊庄口門均屬充足套塘送船毫無阻滯現據具報截至初九日止已出黃林庄境二進大河三幫止共出境船一千二百六十四隻合併陳明所有漕船渡黃順利併籌防潮漲各緣由謹合詞恭摺具

奏伏乞

皇上聖鑒謹

奏

道光十一年四月十四日具

奏五月初三日奉到

硃批另有旨欽此先於四月二十九日承准

軍機大臣字寄兩江總督陶澍江南河道總督
張井道光十一年四月十三日奉

上諭陶澍等奏清水敵黃重運漕船行走順利惟洪
澤湖水勢浩瀚暫消復漲及下游揚糧啟壩洩水
各情形一摺覽奏均悉本年三月底清高於黃將
禦黃壩啟通之後黃水旋長旋消重運漕船均係
順流渡送無須倒塘灌放臨清攔黃兩堰免於啟

閉行走尙爲順利其挽上三閘因上水高於下水
三尺有餘逆流絳挽較爲費手經該督等分委員
弁任工併力趕辦該督等時往督催現在三進幫
船截至四月十二日止已渡黃六百二十餘隻下
餘幫船一千一百數十隻可以計日渡竣惟淇澤
湖水勢已長至一丈九尺餘寸刻當夏令雨水漸
多以東清壩及仁河信壩三處分洩尙停積不消
倘此後再有增長勢必不能容納該督等擬俟在
後幫船全過邵伯鎮卽將上游淇澤湖之智壩義
禮二河下游運河之灣頭壁虎人字等河刻日啟

放騰空湖面以備續漲着該督等督同工員務須認真加意防守俟漕船渡竣後應如何宣洩盛漲并堤堰掣塌各工應行修築之處卽當妥爲籌辦毋致稍有疎虞將此諭令知之欽此

附奏上冬守凍銅船全數催僱出境摺片

再查上冬在河口及北運河一帶守凍銅鉛船
隻前經

奏明飭令隨漕前進茲據催僱員弁具報滇黔兩
省領運委員沈改之楊佩芝方若麟周誦芬王
壽覺羅崇興周孚作等七起共計銅鉛船九十
一隻於三月十七日至四月初五日先後催出
黃林庄交界由東省撥護催僱前進等情謹附
片奏

聞伏乞

聖鑒謹

奏

道光十一年四月十四日附片具

奏五月初三日奉到

硃批知道了欽此

籌議糧船夾帶私鹽請扼要稽查摺子

奏爲籌議糧船夾帶私鹽請治其源扼要稽查以收實效仰祈

聖鑒事竊照江西湖南湖北安徽等省回空軍船夾帶私鹽定例綦嚴連年條陳利病者多而弊仍未除併且日有甚焉固由掩耳盜鈴奉行未力實亦稽查鮮要弊源未清之故何謂弊源未清天津商人利於鬻私甚至在於公埠明目張膽而爲之其弊一公埠雖有印票限以勛數而帶私者並不請票鬻私者並不填票徒法難行其

弊二青縣靜海滄州交河南皮各州縣臨河商店存鹽過多並不按應領應銷實數率付糧艘以鄰爲壑其弊三私鹽窩屯存積河干專候糧船經過千夫運送萬人共見兵役巡查翻無知覺其弊四糧船裝私均用小船載送天津河下私船如織圍繞糧艘白晝上載地方文武熟視無睹其弊五江廣糧道趕辦新漕不能親押回空查私之責惟資幫弁其懦者畏難苟安不肖者知情故縱遇有緣事革職往往在糧船代爲捐復按股攤資卽在夾帶之內其弊六丁舵水手

資本無多緣有奸民名爲風客出本買鹽哄誘
分利在南則裝載木植紙張磁器雜貨抵津易
鹽在北則天津土棍預買屯鹽候船裝載盈千
累萬幾及淮引全綱之數縱有犯案舵水甘心
認罪從不將風客供出固結不解其弊七以上
各弊皆爲糧私橫恣之根必應整飭伏讀近奉
上諭軍船私帶之弊以江廣爲最亦不獨江廣爲然
其透漏鹽餉之弊以天津爲最亦不獨天津爲然
與其搜獲於旣帶之後不若嚴禁於未帶之先等
因欽此仰見

聖明洞燭無微不喻所有天津一帶于家堡楊柳青
獨流等處及滄州之磚河地方現經直隸省委
員巡查自可堵截囤販嚴拿私艇有犯必懲以
杜弊端一入江南地界臣卽委徐州鎮道大員
嚴密迎查兼防河北漏私并於楊莊勾水起卸
渡黃之後應於揚州之搜鹽廳停泊待查惟該
處河道窄隘易致阻礙行船其時臣駐清江浦
督催回空自可就近酌派文武帶同兵役量擇
上游一帶河道稍寬之處照例搜檢隨查隨放
如有例外多帶無論包鹽散鹽塊鹽及鋪船墊

底醜雜蘿蔔各物之鹽皆應起除跟追風客加等嚴治幫弁旗丁一併叅懲至駛出大江之後如老虎涇青山頭等處濱江洲汊多有梟匪私鹽暗遞糧船且因向例有船至大江不可攔阻悞運之文舵水人等卽藉此沿途逗遛賣私遲至冬杪尙未歸次轉多貽悞伏查漕運則例載乾隆三十年奏准糧船夾私在南則盤糧廳揚州儀徵瓜洲等處俱專委文武官搜查等因足見出江以後仍應嚴查祇因廢弛已久僅在揚州一帶搜於北而遺於南遂至江路多私應將

爪儀搜查委員派至九江蕪湖等處會同關督
按船嚴查既不致另有耽延而搜查益昭覈實
其餘濱江沿途各口仍照定例糧船在何處卸
鹽卽應何處查拿不但江私可靖卽催餉亦得
迅速矣至水手人等向遇搜查嚴緊輒棄船四
散混圖挾制委員恐悞歸次往往敷衍了事以
致肆無忌憚自應申明定例一船之內丁舵爲
主水手有犯責在旗丁如有逃匿一面嚴拏究
懲一面督飭弁丁另僱水手駕船回次卽使稍
延旬日儘可照湖南軍船送米岳州之例趕幫

受兌不致有悞而舵水無辭挾制庶幾知盤查
既緊夾帶自稀仰副

聖主整飭鹺綱之至意所有現在籌辦稽查糧私各
緣由謹縷悉陳明恭摺具

奏伏乞

皇上聖鑒謹

奏

道光十一年四月二十五日具

奏五月二十九日奉到

硃批另有旨欽此同日奉到道光十一年五月初八

日內閣奉

上諭陶澍奏籌議糧船夾帶私鹽請扼要稽查一摺
江西湖南湖北安徽等省軍船往往回空時夾帶
私鹽必應嚴行查禁據陶澍奏天津一帶于家堡
楊柳青獨流等處及滄州之磚河地方現經直隸
委員巡查著琦善嚴飭該員等查拏私艇堵截圍
販有犯必懲以杜透漏迨入江南地界著該督派
委徐州鎮道大員嚴密迎查兼防河北漏私楊庄
勾水起卸渡黃後應於揚州之搜鹽廳停泊待查
惟該處河道窄隘易致阻礙行船著該督酌派文

武員弁量擇上游一帶河道稍寬之處照例搜查
隨查隨放如有例外夾帶鹽觔悉行起除根究出
本貿鹽之風客加等嚴治幫弁旗丁一併叅懲至
駛出大江以後著將卅州儀徵搜查委員派至九
江蕪湖等處會同各該關監督按船嚴查所有水
手人等向遇搜查嚴緊輒棄船四散以圖挾制委
員恐悞歸次往往敷衍了事遂致肆無忌憚自應
申明條例一船之內丁舵爲主水手有犯責在旗
丁如有逃匿一面嚴拏究懲一面督率弁丁另雇
水手駕船趕幫受兌不致有悞該督務當督飭所

屬認真稽查俾糧私淨盡以清弊源而收實效餘
着照所議辦理欽此

請遞緩被淹場竈積欠折價錢糧摺子

奏爲勘明場竈因冬春雨雪較多埤蕩被淹應徵
歷年積久折價錢糧恭懇

聖恩俯准遞緩以駐竈困事竊照泰州分司所屬富
安安豐梁垛東臺何垛丁溪草堰劉莊伍祐新
興廟灣十一場坐落東臺興化鹽城阜寧等縣
境內地勢低窪去冬今春雨雪較多宣洩不及
埤場草蕩均有積水難以攤晒煎鹽節據各場
大使以窮丁被淹拮据各情形詳請將積欠折
價錢糧分年帶徵經前鹽政

臣

鍾靈暨

臣

先後

批飭確勘妥議詳辦茲據陞署兩淮鹽運使俞德淵委令署泰州分司運判朱沆親詣各場逐一履勘屬實將積欠援案緩徵詳請具

奏前來臣查富安等十一場地勢極低近年災歉頻仍元氣未復兼之商力疲乏有鹽難銷艱難情形已非一日上年秋收僅止六分本未豐稔冬春以來又復屢次雨雪以致埤蕩多被淹浸攤晒維艱竈戶無以供煎蕩草亦難萌發當此困苦之際既需完納新賦而應帶積年舊欠及上年未完折價銀兩責令同時一併清完實屬

力有未逮所有各該場除本年新賦俱照常徵
輸外合無仰懇

聖恩俯准將泰州分司所屬富安安豐梁垛東臺何
垛五場積欠道光五八兩年併道光十年歷徵
九年除完尙欠折價錢糧及未完口糧銀兩同
丁溪草堰劉莊伍祐新興廟灣等六場積欠嘉
慶二十二三四五等年及道光元二三四五六
七八等年併道光十年歷徵九年除完尙欠折
價錢糧援照嘉慶十八年道光九年海屬板浦
中正臨興三場兩次分徵積欠之案緩至來年

三
隨同壬辰新賦各就最遠年分帶徵二年以次
遞及庶積逋可以漸清而丁力亦不致竭慶以
仰副

聖主軫恤窮竈之至意除飭將本年新賦上緊催徵
併令各場截數造具實欠清冊另行咨部外理
合會同江蘇巡撫臣程祖洛恭摺具
奏伏乞

皇上聖鑒訓示謹

奏

道光十一年四月二十五日具

奏五月十九日奉到

硃批另有旨欽此同日奉到道光十一年五月初八

日內閣奉

上諭陶澍奏勘明場竈被淹懇將積欠錢糧遞緩一摺江蘇泰州分司所屬富安等十一場據該督查明地勢極低頻年災歉上年秋收本未豐稔冬春以來屢次雨雪以致埽蕩多被淹漫竈戶情形拮据現當完納新賦之際若將應帶積年舊欠及上年未完折價銀兩同時併徵丁力實有未逮著照所請除各該場本年新賦俱照常徵輸外加恩將

富安安豐梁梁東臺何梁五場積欠道光五八兩
年併道光十年歷徵九年除完尙欠折價錢糧及
未完口糧銀兩同丁溪草堰劉莊伍祐新興廟灣
等六場積欠嘉慶二十二三四五等年及道光元
二三四五六七八等年併道光十年歷徵九年除
完尙欠折價錢糧援照舊案緩至來年隨同壬辰
新賦各就最遠年分帶徵二年以次遞及以舒丁
力該部知道欽此

兩淮清查案内庚寅佔用各款請同前墊暫緩
歸補摺子

奏爲清查案内庚寅佔用各款續查完竣請同前
墊銀兩暫緩歸補以免套搭恭摺具

奏仰祈

聖鑒事竊照兩淮運庫於道光九年十一月經前鹽

政臣福森

奏請清查旋於十年十二月經前鹽政臣鍾靈

奏覆自道光三年清查截數後起至九年十月初
二日前任運司蔡學川卸事之日止共計墊用

各款銀七百七十九萬七千四百八兩一錢二分三釐除已劃抵歸補外實尙墊銀四百九十九萬七百三十四兩三錢七分四釐開列實墊估礙銀款清單恭呈

御覽併聲明庚寅綱課延歷一年尙未開徵此一年中又已墊估欽奉

諭旨飭交臣查明單內所開數目是否屬實其墊估銀兩如何歸補妥籌覆奏等因當經臣按款查明銀數相符請將估墊銀兩仍照臣會同

欽差大臣王鼎寶興查辦兩淮鹽務各案內奏奉

俞允停舊徵新原議辦理同上年庚寅估墊已丑錢糧一併暫緩攤帶

奏奉

硃批戶部議奏欽此查庚寅估墊已丑及殘綱正雜各款前鹽政

臣

鍾靈原奏截至道光十年十月

止已墊九十餘萬兩自十一月起至年底止一

切支款尙需二三十萬兩統俟年底截數等因

當經

臣

行司確查去後茲據陞署兩淮鹽運使

俞德淵詳稱遵將清查一案督率局員接續稽覈計自道光九年前署運司劉名載十月初一

日交代截數起至本年二月十六日署運司色
卜星額交卸前一日止除各前司任內經徵報
部錢糧各照月日接款覈明數目均屬相符外
所有庚寅年因該綱鹽引未經開徵實計墊解
墊支過庚寅年各項銀款共一百二十三萬九
千四百五十三兩七分六釐等情併開具墊解
墊支佔用各款冊摺請

奏前來

臣

伏查此項庚寅歲支墊款

臣

前同

欽差大臣會議章程十五條內聲明續辦清查積欠
爲數甚鉅若卽按綱帶徵仍啓套搭之根佔礙

新綱地步應俟將來課款充裕再行歸補以免
牽掣欽奉

硃批依議欽此欽遵在案茲查明庚寅實墊銀數應
請同前墊之四百九十九萬餘兩一併俟三五
年間力加整頓鹽務得有起色察看情形如果
暢銷再行

奏明帶徵歸補其辛卯新綱已於本年三月初二
日起徵除飭現任運使俞德淵將徵收銀兩分
別正雜存貯各清各款不准再有挪移墊用外
所有續查庚寅歲支墊估實數及照案請緩帶

補緣由理合開具清單恭摺具

奏伏乞

皇上聖鑒

訓示祇遵再歷任運司交代奏明俟清查完竣結報
現已次第查竣統由現署運司俞德淵接收結
報俟造送冊結另行照例具

題合併聲明謹

奏

謹將庚寅年歲支等項已經墊解墊支銀數併
借用各項銀款開具簡明清單恭呈

御覽

一解過江寧將軍京口副都統兩江總督江蘇
巡撫江寧江蘇藩司江南鹽道等衙門八旗
官兵菜鹽匣費鹽規座船經費永豐壩公費
塘餉關規利息普育堂煮賑經費共銀一萬
六千一百八十八兩三錢七釐

一支過淮北秋單收買場鹽併運壩運所水腳
借動銀十四萬八千六百五十七兩四錢八
分七釐

一支過泰海二屬庚寅年歲底收買寒鹽銀四

萬兩

一支過在外交庫生息銀一萬一千九百三十兩

一支過商領辦

貢辦公銀六十二萬六千六百十九兩五錢七分
一支過院司衙門併所屬場員養廉書役工食
各營巡緝書院膏火普育堂經費一應歲支
各款銀三十九萬六千五百七十七兩七錢一分
二釐

共墊佔銀一百二十三萬九千四百五十

三兩七分六釐

一估用季報冊內正項雜項減半餘平一半充
公各場繳還口糧銀四十三萬二千九百七
十六兩五錢五分四釐

一估用河庫道第一二三三季節省河餉銀三
萬七千五百兩

一估用內務府併京外各衙門利息等款銀十
六萬一千一百二十兩

一估用外省司道衙門鹽規匣費銀九萬九千
二百六十一兩七錢四釐

一 估用內務府參劾變價銀十四萬二千十二兩九錢一分九釐

一 估用商捐緝私經費銀十三萬三千三百八十三兩九錢九分二釐

一 估用已丑綱欠發外支雜款銀二十三萬三千一百九十七兩九錢七釐

以上其合估用銀一百二十三萬九千四百五十三兩七分六釐

道光十一年四月二十五日具

奏五月十九日奉到

硃批戶部議奏欽此

戶部議

奏臣等伏查兩淮運庫墊佔各款銀兩先據前任鹽政鍾靈清查完竣具奏欽奉

諭旨交該督將實墊各款及佔礙銀數是否屬實妥爲籌查覆議嗣據該督覆奏查核墊佔銀數截至九年十月初二日止除劃抵外共計墊用過銀四百九十九萬七百兩零內佔礙正雜各款銀二百九十二萬五千二百兩零外支各款銀二百六萬五千五百兩零核對庫簿底冊竝無

錯訛遺漏其中有由運使核明實應墊用者有
由商人出名公用借領者皆因有緊急支款不
得已而墊發請仍照前議同歷年積欠各款及
上年冬季庚寅綱墊用已丑錢糧一併暫緩攤
帶俟三五年鹽引暢銷再行帶徵歸補經臣部
議以此項墊佔銀兩既據該督核明實因緊款
支用一時未能歸補自係實在情形應准暫緩
帶徵惟墊用運庫實貯之銀與歷年積欠併未
徵解在庫者不同尤未便任其久懸應令一俟
鹽引暢銷迅卽趕緊籌補至上年冬季庚寅綱

墊估已丑錢糧其數若干原奏內並未聲敘併
令確查報部等因奏准遵行在案今據該督奏
稱庚寅墊估已丑及殘綱正雜各款前鹽政鍾
靈原奏截至道光十年十月止已墊用銀九十
餘萬兩自十一月起至年底止一切支款尙需
銀二三十萬行司確查據署運使俞德淵詳稱
自道光九年十月初一日前署運使劉名載交
代截數起至本年二月十六日署運使色卜星
額交卸前一日止實計庚寅年墊解墊支各項
銀款共一百二十三萬九千四百五十三兩七

分六釐應請與前墊之四百九十九萬餘兩一併俟三五年間察看情形再行帶徵歸補等語臣等查該清單內開外支各款均係按年應用之項庚寅綱引並未開徵該年應用之項仍須隨時給發自不能不輾轉挪墊所有佔礙各項銀款共一百二十三萬九千四百五十三兩七分六釐與前任鹽政鍾靈清查截數以前墊用之四百九十九萬餘兩事同一律現既未能歸補應照臣部前議准其一併暫緩帶徵俾免牽掣仍請

勅下該督一俟鹽引暢銷卽行趕緊籌補毋得藉詞
延宕至本年辛卯開綱以後該運庫徵收各項
銀兩自應遵照新定章程分別正雜另款存貯
前經臣部奏明永遠不准再有挪墊應仍責成
該督隨時嚴密稽查如有陽奉陰違立卽指叅
究辦以杜弊混再臣部道光九年籌增新疆經
費案內議於兩淮丙丁銃引新懸墊徵還項下
酌撥銀一百萬兩自己丑年起至癸巳年止每
年解赴甘肅銀二十萬兩除已丑年應解銀兩
已據報解外其庚辛壬癸四年共應解銀八十

萬兩前據該督彙入積欠案內一併請緩經

臣

部以經費未便短缺奏明仍令按年如數解往
茲復據該督咨稱庚寅年應解銀二十萬兩原
係派入庚寅綱運引鹽內按引帶徵起解今庚
寅引鹽已奉奏明停緩而上年已丑徵課復爲
庚寅歲支佔用此時無從籌解請另行籌撥抑
仍由運庫遞緩一綱徵解等語查庚寅綱引既
未開徵前項經費自係無從徵解而新疆需用
銀兩係爲新增官兵養廉鹽菜等項之用必須
隨時給發

臣

等公同酌議所有庚寅綱應解該

處新增經費擬令陝甘總督先於此次存剩軍需款內暫行撥出銀二十萬兩以資接濟仍俟兩淮銀兩解齊卽行照數劃還歸款至兩淮辛卯綱引現在業已開徵應請

飭令該督卽於辛卯新徵引課內趕緊催提銀二十萬兩迅卽委員解赴甘肅藩庫轉解新疆應用毋再遲延其庚寅一綱旣未撥解經費銀兩應令於甲午綱引內遞行徵解以足原撥一百萬之數又現據該督片奏淮北商力積疲暫籌借項請在已丑殘引加勸項內酌動銀二十萬兩

以爲運腳及收買竈鹽之用欽奉

諭旨准行在案查淮鹽酌議加餉前據該督奏明每
綱可得銀五十餘萬兩以之帶補已丑未完積
引三分及庚寅未行綱引俱係照依現定新綱
科則完納正課錢糧應於徵完後報部入撥今
此項銀兩尙未徵完已據該督預籌借用恐甫
經清釐又敢挪動正款之漸除此次請動銀二
十萬兩係奉

特旨借給自應欽遵辦理外其本年應行帶徵之加
餉正課尙有三十餘萬兩應令該督隨同辛卯

綱課實力催徵一俟徵有成數卽行報部候撥
嗣後不得再將外支款目動用正課以重帑項
而免輾轉等因奉

上諭戶部奏嚴議兩淮墊佔各款分別辦理一摺兩
淮所有佔礙各項銀款共一百二十三萬九千四
百五十三兩零據戶部查明與前任鹽政鍾靈清
查截數以前墊用銀兩事同一律現旣未能歸補
著照該部前議准其一併暫緩帶徵俾免牽掣仍
著該督一俟鹽引暢銷卽行趕緊籌補毋得藉詞
延宕至本年辛卯開綱以後該運庫徵收各項銀

兩自應遵照新定章程分別正雜另款存貯前經該部奏明永遠不准再有挪墊著責成該督隨時嚴密稽查如有陽奉陰違立即指叅究辦以杜弊混至另片奏請徵解新疆經費併催徵加勛正課等語著陝甘總督將庚寅綱應解該處新增經費先於此次存剩軍需款內暫行撥出銀二十萬兩以資接濟仍俟兩淮銀兩解齊卽行照數劃還歸款至兩淮辛卯綱引現在業已開徵著飭令該督卽於辛卯新徵引課內趕緊催提銀二十萬兩迅卽委員解赴甘肅藩庫轉解新疆應用毋再遲延

其庚寅綱引既未開徵自係無從徵解著於甲午綱引內遞行徵解以足原撥一百萬之數又加勛銀兩前據該督奏請酌借二十萬兩爲淮北運腳及收買竈鹽之用此項銀兩尙未徵完已據豫籌借用恐甫經清釐又敢挪動正款之漸除此次仍准動用借給外至本年應行帶徵之加勛正課尙有三十餘萬兩著該督隨同辛卯綱實力催徵一俟徵有成數卽行報部候撥嗣後不得再將外支款目動用正課以重帑項而免輭轍欽此

籌議借項官督商運淮北各滯岸摺片

再淮北商力積疲已久上年發運秋單時能趕發場鹽存壩運銷者僅止數人其餘各商雖有認岸之名終年無鹽到岸小民刻虞淡食轉仰給於隣私而各場竈產鹽積如山無商收買窮竈乏資餬口前經

欽差大臣王鼎等會

奏查辦淮鹺事宜十五條內議請湖運各岸應行革退之商另招股商先籌官運以爲倡導之機一面籌款收買竈鹽以濟口食仰蒙

俞允在案茲臣督同運司詳加查察淮北引鹽額行

河南安徽江南四十九州縣除江運之無爲州等八處運膠較省向稱暢岸有商承運外其餘綱食口岸四十一處商人十七家有一商而認數岸者有一岸數商公認者其力可支持僅有二三家餘皆無力辦運本應另招殷商接辦因疲累久著人皆視爲畏途僉辦招徠一時難得其人且久無到岸之引各處需鹽孔迫不得不先籌運濟惟委官運辦窒礙甚多而借銀給商又難歸款止有暫籌借項官督商運之一法較

之專委於官專借與商尙有把握查永豐壩現有存貯歷次運庫發銀收買官鹽九萬一百七十二引應擇誠實商人借給水腳領運分赴各岸併遴員督運俟其到岸售有課銀收回應完錢糧及鹽價借項繳庫歸款其各滯岸銷鹽本屬無多卽由附近暢岸隨時撥往接濟免致盡爲私佔第自壩渡黃過湖至岸運費浩繁若以存鹽而計共需運腳銀四十餘萬兩方能全數運竣現在庫貯支絀無項可動而事關北岸全局又不得不量爲籌辦仰懇

天恩俯准於已丑殘引加觔案內帶徵課銀催商趕緊交完先酌動銀二十萬兩以十二萬兩爲前項運腳之需輓轡轉運其餘八萬兩因海州分司所屬板浦中正臨興三場運商久不捆鹽竈戶枵腹待售困苦已極應查照上年原

奏辦理趕緊收買以濟竈艱卽將收買之鹽存貯各場俟本年秋單發運至壩飭商領運繳價還庫仍將收買發運事宜責成淮北監掣同知陳在文一手經理以專責成仍趕緊招商接辦庶積困或可稍甦感沐

鴻慈益無既極據陞署兩淮運司俞德淵議詳前來
理合附片陳明伏乞

聖鑒謹

奏

道光十一年四月二十五日具

奏五月十九日奉到

硃批另有旨欽此同日奉到道光十一年五月初八
日內閣奉

上諭陶澍奏淮北商力積疲請暫籌借項官督商運
等語淮北商力疲累已久此時招商另辦難得其

人且各處需鹽孔迫不得不先籌運濟據該督查
明永豐壩現有存貯歷次運庫發銀收買官鹽九
萬一百七十二引應擇誠實商人借給水腳領運
分赴各岸併遴員督運俟其到岸售有課銀收回
應完錢糧及鹽價借項繳庫歸款其各滯岸銷鹽
無多卽由附近暢岸隨時撥往接濟所需運腳銀
兩著照所請准其在於已丑殘引加勛案內帶徵
課銀催商趕緊交完先行酌動銀二十萬兩以十
二萬兩爲前項運腳之需其餘八萬兩因海州分
司所屬板浦中正臨興三場運商久不捆鹽竈戶

困苦著查照上年原奏辦理趕緊收買卽將收買之鹽存貯各場俟本年秋單發運至壩飭商領運繳價還庫所有收買發運事宜卽責成淮北監掣同知陳在文妥爲經理仍趕緊招商接辦以肅鹺政欽此

附陳兩淮運庫歷年欠解各款請緩攤帶摺片
再兩淮運庫歷年欠解戶部京外各衙門各款
皆係節經前任各鹽政於清查銃引等案

奏准分綱帶徵除道光二年清查積欠銀兩已蒙
聖恩展至道光二十三年帶徵毋庸查造外所有道
光八年丙丁銃引案內查出併道光九年清查
墊估及庚寅年歲支墊估戊子已丑各款銀兩
共計欠解正雜及鹽規匣費

帑利等銀一千四百五十萬一百八十八兩四錢
九分五釐均經臣會同

欽差大臣王鼎寶興

奏准一併暫緩攤帶俟將來鹽引暢銷後察看情形再行

奏請分綱帶徵歸款所有欠解各處暫緩攤帶歸還之款現經臣飭行運司查造清冊詳送前來除將各冊咨送戶部內務府等衙門查照外理合附片陳明謹

奏

道光十一年四月二十五日具

奏五月十九日奉到

殊批該部院知道欽此